



Inatsisartunut ilaasortaq
Naaja H. Nathanielsen (Inuit Ataqatigiit)

Inatsisartut Suleriaasianni § 37 naapertorlugu Inatsisartuni ilaasortaq Naaja H. Nathanielsen-ip apeqqutaanut akissuteqaat

21. januar 2014
Sagsnr. 2014-094966
Dok. Nr. 1459467

9. januar 2014-imi oqaatsit pillugit inatsit Namminersorlutillu Oqartussat suliariumannittuussisarnerat pillugit arlalinnik apeqquteqaateqarputit. Apeqqutinnut soqutigintartunut qujanaq.

Postboks 1037
3900 Nuuk
Tlf. (+299) 34 50 00
Fax (+299) 32 46 14
E-mail: oed@nanoq.gl
www.nanoq.gl

1. Oqaatsit pillugit inatsit¹ ima paasineqarsinnaava suliammat atatillugu danskisuinnaq Namminersorlutik Oqartussanut saaffiginnittoqartarnissaa namminersorlutik Oqartussat piumasaqaatigisinnaagaat?

Akissut:

Tamanna oqaatsinut politikki pillugu Inatsisartut inatsisaat nr. 7, 19. maj 2010-meersumi § 3-mi imm. 1-imi allaqqavoq kalaallit oqaasii Kalaallit Nunaanni pisortatigoortumik oqaasiusut. Aalajangersakkami aamma erseqqissarneqarpoq kalaallit oqaasii pisortat ingerlatsineranni atorneqartussaasut. Oqaatsinut politikki pillugu Inatsisartut inatsisaat nr. 7, 19. maj 2010-meersumi aamma aalajangersagaavoq § 3, imm. 3-mi, danskisut oqaasii pisortatigut ingerlatsineranni atorneqarsinnaasut aamma imm. 4 malillugu tuluit oqaasii allamiullu oqaasii allat pisariaqartitsineq malillugu atorneqarsinnaasut.

Oqaatsinut politikki pillugu Inatsisartut inatsisaat nr. 7, 19. maj 2010-meersumi kiisalu Kalaallit Nunaanni Namminersorlutik Oqartussat pillugit Inatsimmi § 20-imi pisortatigut oqaatsit pillugit aalajangersakkani tamanna uppersarneqarpoq aalajangersarneqarluni oqaatsit allat atorneqarsinnaasut, matumani danskisut oqaatsit.

Inatsimmi oqaasertaliunneqartut, tassalu pisortani sullissineranni kalaallisut danskisullu oqaatsit atorneqarsinnaasut, naapertorlugit paatsoorneqarsinnaavoq sulineranni qanoq tamanna isumaqarneris. § 37 naapertorlugu apeqqutinnut siullermut (nr. 260-mut) akissuteqaatit tassunga ataneqartillugit isiginiarneqassapput.

Naak inatsimmut oqaaseqaatit naapertorlugit oqaatsinik atuinissamut aalajangersakkanut tamakkiisumik ataasiinnarmillu paasinninnissamut ajorluartumik tapiinngikkaluartut inatsimmut piareersaatit misissoreerlugit tamanna tunngavigalugu ima paasineqartari-aqassaaq, tassalu suliami danskisuinnaq saaffiginnittoqarnissaanik piumasaqarnissaq oqaatsinut inatsisip siunertaanut naapertuutinningsit.

Naalakkersuisut taamaammat ingerlatsivinni tamani danskisuinnaq saaffiginninnissamut piumasaqartarunnaassaaq.

¹ Oqaatsinut politikki pillugu Inatsisartut inatsisaat nr. 7, 19. maj 2010-meersaq

Naalakkersuisut oqaatsinut politikki pillugu Inatsisartut inatsisaat nr. 7, 19. maj 2010-meersoq nutartilerunikku aamma oqaatsinik atuinissamut aalajangersakkat ersarissarni- arpaat, taamaalilluni inatsimmi ersarississalluni aalajangersakkat qanoq atuutsinneqas- sanersut.

2. Namminersorlutik Oqartussat suliariumannittussarsiuussisarnerat inatsitigut najoqqutassanut atuuttunut allanut, assersuutigalugu pisortat ingerlatsineranni suliassat suliarineqartarnerat pillugu inatsimmi § 7a-mut², imaluunniit ingerlatsi- nermi ileqqorissaarnermut, unioqutitsisutut isigineqarsinnaanerpa?

Akissut:

Apeqqutigineqartumi tunngavigineqartutut pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq sulianut soorlu isumaqatigiissutinut atuutinngilaq, taamaallaat suliamut attuumassuteqarnermut kiisalu nipangiussisussaaitaanermut tunngasuni.

Ingerlatsinermi ileqqorissaarneq pillugu oqaatigineqassaaq pisortani oqartussat innut- taasut suliffeqarfiillu assigiimmik sullittussaammatigit aamma assersuutigalugu oqaatsit tunngavigalugit saaffiginninnissaannut mattunneqassanngimmata. Taamaammat innut- taasooq suliffeqarfilluunniit pisortanut attaveqarnissamut ajornartorsiuteqarpat pisortat suliaq ima aaqqissuutissavaat, sullissineq oqaatsit kissaatigineqartut naapertorlugit ingerlatissallugu.

Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq sulianut soorlu isumaqatigiissutinut atuutinngikkaluartooq Naalakkersuisut isumaqarput suliariumannittussarsiuussinerit ima aaqqissuunneqartari- aqartut, innuttaasut suliffeqarfiillu tamarmik oqaatsit naapertuunnerusorisatik atorlugit akissuteqarsinnaalersillugit.

3. § 37 naapertorlugu apeqqummut nr. 260-imut apeqquteqaatigisannut akissuter- tik Naalakkersuisut aalajangiusimaannassappassuk taava paaserusuppara taamatut ingerlatsinikkut suliffimmik piginnittut amerlanertigut kalaallisut oqaa- sissiorumanerusartut, aamma oqariartaatsit teknikkimut tunngassuteqartut eqqarsaatigalugit, killilersuiffigineqannginnersut?

Akissut:

Apeqqummut 2-mut akissuteqaammi takuneqarsinnaasutut suliffeqarfiutillit oqaatsinik naapertuunnerusorisaminnik atuinissaannik killilersornissaat Naalakkersuisut kissaati- ginngilaat.

Inussiarnersumik inuulluaqqusillunga


Vittus Qujaukitsoq

² Pisortat ingerlatsineranni suliassat suliarineqartarnerat pillugu Inatsisartut inatsisaanni nr. 8, 13. juni 1994-imeersumi, ilaatigut inatsisartut inatsisaatigut nr. 21, 30. oktober 1998-imeersutigut allanngortinneqartoq